



LE GOUVERNEMENT
DU GRAND-DUCHÉ DE LUXEMBOURG
Ministère de la Santé
et de la Sécurité sociale

Äntwert vun der Madamm Ministesch fir Gesondheet a sozial Sécherheet op d'parlamentaresch Fro n° 2848 vum 9. September 2025 vun der honorabeler Deputéiert Madame Alexandra Schoos.

1. Wann Impfungen bei Aarbechtsdokteren vum CGDIS gemaach ginn, fënnt een déi net automatesch a sengem DSP. Doduerch kënn et zu falschen Impfzettel. Firwat erméiglecht de System net, datt all Dokter, deen zu Lëtzebuerg zougelouss an tätig ass, ënnert dem Patient senger Matricule eppes kann aginn, wat dann automatesch am DSP vum Patient vermierkt gëtt?

Déi automatesch Impfzettel ginn duerch de *carnet de vaccination électronique* (CVE) verschéckt, an net duerch den *dossier de soins partagé* (DSP). Den CVE ass eng Software déi et Dokteren erlaabt, d'Impfungen vun hire Patienten ze enregistreieren, ze consultéieren an ze suivéieren. E bitt dem Dokter awer och eng Hëllef fir Impfentscheedungen (SADV).

D'Benotzung vun der CVE-Plattform ass net obligatoresch fir d'Vaccinateuren. Doktere kënnen welen ob si d'CVE-Formatioun maachen an ob si en CVE fir hir Patienten opstellen. Wann en Dokter en CVE fir e Patient opmécht, kann de Patient decidéieren, ob seng Impfdaten automatesch an de DSP erofgeluede ginn. Donnéeën ginn dann automatesch am DSP aktualiséiert, wann eng nei Impfung vum Dokter am CVE enregistreiert gëtt. Fir den Ament gëtt de CVE net vun der Aarbechtsmedezin vum CGDIS fir d'Impfungen agesat.

2. Wien ass berechtegt, d'Impfungen géint Covid-19, déi elo vum Oktober un nees sollen zur Verfügung stoen, ze maachen? Wéi gesäit d'Organisatioun aus bei der Impfberechtigung an der Verdeelung vun den Impfdosen?

All Dokteren, déi zu Lëtzebuerg praktizéieren, däerfen d'COVID-19-Impfung administréieren. D'Apdikter däerfen dës Impfung administréieren wann se am Virfeld un enger spezifischer Formatioun partizipéiert hunn déi vum Ministère fir Gesondheet a sozial Sécherheet ugebueden gëtt.

D'Logistik bleift déi selwecht wéi d'Jore virun: d'Vaccinateuren bestellen de COVID-19 Impfstoff iwwert d'Plattform MSVAC. D'Impfstoffer ginn da gratis un déi jeeweileg Dokteschcabinete, respektiv Apdikte geliwwert.

3. Wat fir Covid-19-Impfstoffer a wéi vill Dosen dovun huet d'Regierung fir dës Saison bestallt?

Fir d'Joer 2025 ginn 158.405 Dose vum Impfstoff Comirnaty, dee géint Variant LP.8 wierksam ass, zu Lëtzebuerg erwaart.

Dräi Formulatiounen vun dësem Impfstoff sinn disponibel:

- fir Erwuessener,
- fir Kanner tëscht 5 an 11 Joer,
- fir kleng Kanner vu 6 Méint bis 4 Joer.



4. Besteet ëmmer nach de bekannte Kaskaderegime iwwert d'APA (Advance Purchase Agreement) oder gëtt et aktuell e Marché public fir den Akaf vun den Impfstoffer? Wien dréit hei d'Responsabilitéit vun den Impfschied?

D'Liwwerunge fir d'Joer 2025 si weiderhin am Kader vum *Purchase Agreement*, tëschent der europäescher Kommissioun a Pfizer / BioNTech. Dësen gouf am Joer 2021 ofgeschloss. De Staat dréit d'Responsabilitéit fir d'COVID-19 Impfung op Basis vum Gesetz vum 4. Juli 2000 *relative à la responsabilité de l'Etat en matière de vaccinations*.

5. Duerch dat lescht gestëmmt Covid-19-Gesetz (Loi du 28 juin 2024 portant modification de la loi modifiée du 17 juillet 2020 relative à certaines mesures de suivi de l'évolution du virus SARS-CoV-2 et de lutte contre la maladie Covid-19.) huet d'Regierung sech d'Sammelen an d'Verwäerte vun Donnéeën am Zesummenhang mat der Covid-19-Impfung geséichert, déi Hëllef sollten, fir ënner anerem den Notze vun den Impfungen ze analyséieren. Wou ass déi Analys drun?

No der Pandemie huet d'Regierung e gesetzleche Kader fir d'Sammelen an d'Notze vun Donnéeën am Zesummenhang mat der Impfung géint de COVID-19 ageriicht. D'Donnéeë vu COVID-19 Impfungen, déi bis den 31. Mäerz 2023 (Reporting-Enn) gesammelt goufen, hunn zu dräi nationale Rapporte gefouert iwwer d'Wierksamkeet vun de COVID-19 Impfstoffer. Dës Rapporte goufen an de Joren 2021¹, 2022² an 2023³ no der universeller Impfkampagne géint COVID-19 publizéiert. Si liwwere staark Beweiser fir de Schutz, deen d'Impfung géint schwéier Verleef an och Hospitalisatiounen bei geimpfte Persounen bitt.

Et goufen och wëssenschaftlech Studien a Fachzeitunge publizéiert : Am Kader vun internationalen Zesummenaarbechte konnt de Verglach tëscht de schwéiere Verleef vu verschiddene COVID-19-Variante gemaach ginn. D'Analysen hu gewisen, datt Omikron BA.1 am Duerchschnitt manner schwéier Verleef verursaacht huet wéi Delta⁴. Zousätzlech konnt d'Efficacitéit vun de COVID-19 Impfstoffer geschat ginn, déi eng kloer Reduktioun vun Hospitalisatiounen an Doudesfäll gewisen huet⁵.

Donnéeë vu Lëtzebuerg sinn och bei der europäescher Etude *Vaccine Effectiveness, Burden and Impact Studies* (VEBIS)⁶ agefloss.

Aktuell baséieren sech d'Experten op d'Analyse vum Aarbechtsgrupp vun der *European Medicines Agency* (EMA) iwwer Impfstoffer. Dësen Aarbechtsgrupp schafft ënner anerem mat der Weltgesundheitsorganisatioun (WHO) zesummen a berécksichtigt eng grouss Villfalt u Donnéeën, ënner anerem Informatiounen iwwer d'Entwécklung vum Virus an d'Resultater vun Efficacitésstudien zu nei ugepassten Impfstoffer.

¹ [Rapport sur l'efficacité vaccinale contre la COVID-19 au Luxembourg - Portail Santé - Luxembourg](#)

² [2e Rapport sur l'efficacité vaccinale contre la COVID-19 au Luxembourg - Portail Santé - Luxembourg](#)

³ [évaluation-de-l'efficacité-vaccinale-dernière-mise-jour-finale.pdf](#)

⁴ [Eurosurveillance | A standardised protocol for relative SARS-CoV-2 variant severity assessment, applied to Omicron BA.1 and Delta in six European countries, October 2021 to February 2022](#)

⁵ [High vaccine effectiveness against severe COVID-19 outcomes and population preventable fraction during the Omicron era in Luxembourg: A nationwide retrospective risk factor analysis - ScienceDirect](#)

⁶ [Vaccine Effectiveness, Burden and Impact Studies \(VEBIS\)](#),



6. Wann d'Regierung d'Auswärtung vun den nationalen Donnéeën nach net sollt hunn, huet si dann Analysen zu internationalen Donnéeën consultéiert, fir d'Effikassitéit vun der Impfung ze bewäerten an de Risiko-Notzen-Faktor anzeschätzen? Wa jo, wat fir Analyse waren dat?

Wéi virdrun erwänt, goufen d'Donnéeën op nationalem Niveau analyséiert. Zousätzlech stäipt sech d'Regierung op verschidde wichteg international Etüden, ënner anerem:

- EMA: D'EMA bestätegt, datt d'Impfungen, déi an der EU zougelooss sinn, nach ëmmer e gudde Schutz géint schwéier Fäll vun COVID-19 bidden, och bei neie Varianten⁷.
- *European Centre for Disease Prevention and Control (ECDC)*: Observatiounsetüden an der EU/EEE weisen, datt d'Impfungen och no der Pandemie nach héich Wierksamkeet géint Hospitalisatiounen an Doudesfäll hunn⁸.
- WHO: Eng Etüd vun der WHO/Europa schätzt, datt d'Impfungen méi wéi 1,4 Milliounen Liewen an der europäescher Regioun gerett hunn, mat bis zu 62 % manner Doudesfäll bei Leit iwwer 80 Joer⁹.
- Rezent wëssenschaftlech Etüden: Nei Fuerschungen weisen, datt déi ugepassten Impfungen och géint déi rezent Varianten nach ëmmer gutt schützen, besonnesch fir Hospitalisatiounen ze vermeiden¹⁰.

7. Am DSP steet bei „Autres informations“ zur Covid-19-Impfung: « Le risque de forme grave de COVID-19 augmente de manière exponentielle avec l'âge. La vaccination est particulièrement efficace pour empêcher les formes graves de la maladie ». Wéi bewäert d'Regierung d'Effikassitéit vun der Covid-19-Impfung opgrond vun de gesammelten Donnéeën? Wéi schätzt d'Regierung de Risiko-Notzen-Faktor dobäi an?

Wéi am CVE erwänt, ass unerkannt datt de Risiko fir eng schwéier Form vun COVID-19 mam Alter klëmmt, an datt d'Impfung besonnesch effektiv ass, fir de schwéiere Verlaf ze verhënneren.

Aktuell Donnéeën erlaaben folgend Aussoen ze man:

- D'Effikassitéit vun Impfungen ass héich a verhënnert schwéier Verleef (besonnesch bei eelere Persounen a bei Risikogruppen)¹¹.
- D'Impfung gëllt als méi nützlich a positiv wéi riskant fir dës vulnerabel Persounengrupp, sou datt ee Rappel am Wanter fir dës Gruppe recommandéiert gëtt.
- Fir déi aner Gruppe gëtt eng proportionéiert Approche ugewannt, déi d'epidemiologesch Entwécklung an déi wëssenschaftlech Donnéeën berücksichtegt.

⁷ [COVID-19 vaccines: key facts | European Medicines Agency \(EMA\)](#)

⁸ [Vaccine Effectiveness, Burden and Impact Studies \(VEBIS\)](#)

⁹ [Une nouvelle étude indique que les vaccinations contre la COVID-19 ont sauvé plus de 1,4 million de vies dans la Région européenne de l'OMS](#)

¹⁰ [Effectiveness of Updated 2023-2024 \(Monovalent XBB.1.5\) COVID-19 Vaccination Against SARS-CoV-2 Omicron XBB and BA.2.86/JN.1 Lineage Hospitalization and a Comparison of Clinical Severity-IVY Network, 26 Hospitals, October 18, 2023-March 9, 2024 - PubMed](#)

¹¹ <https://www.eurosurveillance.org/content/10.2807/1560-7917.ES.2024.29.3.2300708>

[Efficacité des vaccins COVID19 : un risque de formes graves divisé par 9 selon 2 études françaises](#)



8. Zousätzlech liest ee bei „Commentaires“: « Un rappel hivernal est à prévoir chaque année, au moins 6 mois après la dernière vaccination ou infection. » Wéi ginn Infektiounen an deem Kader bestëmmt a wéi kann eventuell eng Titerbestëmmung am Kader vum Infektiounsschutz mat berécksiichtegt ginn?

Den Dokter huet d'Méiglechkeet am CVE vum Patient den Datum vun der leschter bekannter COVID-19 Infektioun anzedroen. Entsprechend de Recommandatioune vum *Conseil Supérieur des Maladies Infectieuses* (CSMI) ass fir Risiko-Persounen eng Impfung am Ufank vum Wanter recommandéiert, ënner der Konditioun datt zanter der leschter COVID-19 Infektioun (falls bekannt) op d'mannst 6 Méint vergaange sinn. Eng Infektioun kann duerch e PCR Test oder e Self-test/Autotest bestëmmt ginn.

9. Kritt am DSP jiddwereen de sougenannten „Rappel hivernal“ fir eng Covid-19-Impfung, oder just bestëmmten Alters- a sougenannte Risikogruppen? Wa just bestëmmten Alters- a sougenannte Risikogruppen dëse Rappel kréien, wat sinn dann d'Krittären, déi bestëmmen, ob een zu deene Gruppe gehéiert?

D'Recommandatioune vum CSMI betreffend de COVID-19 ginn am CVE ëmgesat. Dofir krut all Persoun, déi en CVE huet an iwwer 65 Joer al ass oder vum Dokter am „Gesondheetsprofil“ vum CVE als Risikopatient agestuut gouf en Impfrappell geschéckt (wann Persoun zougestëmmt huet Notifikatioune vum CVE ze kréien).

Als Risikogrupp gi Persoune consideréiert, déi méi all wéi 65 Joer sinn oder zu follgende Risikogruppe gehéieren¹²:

- Schwanger Frae mat enger associéierter Comorbiditéit,
- Erwuessener, déi follgend Comorbiditéiten hunn: Obesitéit mat engem BMI iwwert 30, behandelt Diabetes, schwéier Häerz-Kreeslaf-Erkrankung, chronesch Longekrankheet, chronesch Liewerkrankheet, chronesch Nierekrankheet, Kriibs oder eng Hämopathie, Krankheets- oder Behandlungsbedéngt Immunschwächt,
- Kanner mat Comorbiditéiten, déi de Risiko vun enger schwéierer COVID-19-Infektioun erhéijen.

Jiddereen deen sech géint COVID-19 schütze well, kann sech och impfe loossen.

10. Gëtt deen „Rappel hivernal“ fir eng Covid-19-Impfung och nach iwwert aner Weeër vermëttelt? Wa jo, iwwer wat fir Weeër?

Zu Lëtzebuerg, gëtt all Joer iwwert Sensibiliséierungscampagnen an notament iwwert d'Campagne géint respiratoresch Infektiounen¹³ am Oktober un den „*Rappel hivernal*“ erënnert. Dës Campagnen adresséieren sech esouwuel un de Grand public wéi u Gesondheetsberuffer (Dokteren an Apdikter).

D'saisonal COVID-19 Impfung ass och am nationale Impfkalenner festgehalen¹⁴. Weider Informatiounen zum COVID-19 Rappel sinn disponibel op : [COVID-19 - Portail Santé - Luxembourg](#).

¹² [CSMI Recommandation pour la vaccination en automne/hiver contre la COVID-19](#)

¹³ [Une infection respiratoire, c'est tout sauf tendance - Portail Santé - Luxembourg](#)

¹⁴ [Calendrier des vaccinations et des immunisations passives - Portail Santé - Luxembourg](#)



11. Am Focus online liest een an engem Artikel vum 1.9.2025 (*), datt d'Corona-Impfstoffer an den USA elo nëmmen nach mat beträchtleche Restriktiounen zougelooss ginn. Esou ginn do d'Covid-19-Impfstoffer elo just nach fir eeler a krank Mënschen zougelooss. Gesond Erwuessener ënner 65 Joer a Kanner ouni Virerkrankunge solle faktesch keen Zougang méi zu de Covid-19-Impfstoffer vu Pfizer, Moderna an Novavax hunn a mussen dann deier dofir bezuelen. Huet d'Regierung fir Lëtzebuerg och bestëmmte Recommandatiounen oder Restriktiounen virgesinn? Wa jo, wat fir eng?

() Neue Regeln durch US-Behörden - Corona-Impfstoffe in den USA nur noch für alte und kranke Menschen zugelassen: https://www.focus.de/finanzen/news/corona-impfstoffe-nur-noch-fuer-alte-und-krank-menschen-zugelassen_eccb7120-9e78-4518-9713-7e95483dd02.html?utm_medium=social&utm_source=facebook&utm_campaign=focus-online-gesundheit*

D'Food and Drug Administration (FDA) an de Vereenegte Staaten huet de 27. August 2025 déi provisoersch Autorisatiounen (emergency use authorizations, EUA) fir d'COVID-19 Impfungen zrëckgezunn. Dofir sinn normal, regulär Autorisatiounen fir dës Impfungen ausgestallt ginn mat der Konditioun, dass dës Impfung bei Leit benotzt ginn déi méi wéi 65 Joer al sinn, respektiv bei Leit déi manner wéi 65 Joer a méi wéi 6 Méint al sinn (fir de Spikevax vu Moderna), wann si eng vun de Virerkrankungen aus enger Lëscht vun aktuell 22 Virerkrankungen hunn.

Den amerikaneschen Advisory Committee on Immunization Practices (ACIP) huet den 19. September awer recommandéiert datt d'Impfung géint COVID-19 op individueller Basis soll entscheet ginn zesumme mam Gesondheitsberuffer (dës Approche erlaabt datt d'Käschten duerch verschidde Bezuemechanismen gedeckt kënnen ginn)¹⁵.

An Europa hunn dës Impfung schonns länger eng regulär europäesch Autorisatioun déi et erlaabt ab dem Alter vu 6 Méint ze impfen. D'EMA weist drop hinn, dass dës Impfungen no den nationale Recommandatiounen sollen administréiert ginn.

Zu Lëtzebuerg, huet den CSMI vir d'lescht am August 2024 Recommandatiounen erausginn, déi och d'Impfung bei Leit iwwer 65 Joer, respektiv bei Leit ënner 65 Joer mat Virerkrankunge recommandéiert. An Europa – also och zu Lëtzebuerg - bleift aktuell d'Impfung disponibel fir Leit ënnert 65 Joer ouni Virerkrankung wann dës decidéieren dass si se wëllen hunn.

Lëtzebuerg, den 13. Oktober 2025

D'Ministesch fir Gesondheet
a sozial Sécherheet

(s.) Martine Deprez

¹⁵ [ACIP Recommends COVID-19 Immunization Based on Individual Decision-making | HHS.gov](#)